

- प्रदेश मांय मुख्यमंत्री रोजगार उत्सव रो आयोजन काले- मुख्यमंत्री भजन लाल शर्मा नव नियुक्त कार्मिकां सूं संवाद करेला ।
- शिक्षा मंत्री धर्मेन्द्र प्रधान नीट परीक्षार्थियां ने भरोसो दियो के नीट मामला रा दोषियां रे खिलाफ कड़ी कार्रवाई करी जावेली ।
- राज्यपाल कलराज मिश्र कह्यो है के बालिका शिक्षा सूं ही महिला सशक्तिकरण ने बधावो दियो जा सके है ।
- प्रदेश मांय मॉनसून और आगे बधने रे साथे ही मौसम महकमो काले सूं 2 जुलाई ताईं भरतपुर अर जयपुर संभाग मांय केई ठोडा माथे भारी बिरखा री आस जताई ।

0000

प्रदेश मांय काले मुख्यमंत्री रोजगार उत्सव रो आयोजन कर्यो जावेलो । इण मांय 20 हजार सूं बत्ती नवनियुक्त कार्मिक भेळा होवेलो । महोत्सव मांय मुख्यमंत्री भजन लाल शर्मा नुवा बण्या राजकीय कार्मिकां रे उत्साह-वर्धन खातिर वां ने संबोधित करेला अर चुण्योडा कार्मिकां सूं बणतल भी करेला । सगळा जिला मांय रोजगार उच्छव री तैयारियां पूरी कर ली गई है । सवाईमाधोपुर जिले मांय 250 नुवा चुण्या कार्मिकां ने कार्यक्रम स्थल माथे मुख्यमंत्री रो बधाई संदेश अर लोक सेवकां रे कर्तव्य, दायित्व अर अपेक्षावां रा बारा मांय बुकलेट भी प्रदान करी जावेलो । जिला रोजगार कार्यालय रा उपनिदेशक बतायो के कार्यक्रम मांय राज्य सरकार रा न्यारा-न्यारा महकमां मांय नवनियुक्त कार्मिकां ने नियुक्ति पत्र अर स्वागत सेट प्रदान कर उपस्थिति प्रमाण पत्र जारी कर्यो जावेलो । भीलवाडा मांय जिला स्तरीय कार्यक्रम महाराणा प्रताप सभागार टाउनहॉल मांय व्हेला, जिण मांय 477 नुवा चुण्या कार्मिक भेळा व्हेला ।

0000

संसदीय कार्य मंत्री किरिन रिजिजू विपख रे आचरण री निंदा करता थकां कह्यो के वे संसद रे काम मांय बाधा डाल र नियम अर परम्परावां री अवहेलना कर रह्या हैं । संसद सूं बारे मीडिया सूं वणां कह्यो के सरकार हर मुद्दे माथे चर्चा खातर तैयार है, पण विपख ने सदन रे नियमो रो पालन करणो व्हेला । इण सूं पैला विपख नीट परीक्षा मुद्दे माथे दोन्यू सदन री कार्यवाही बाधित करी ही । इण बीच कांग्रेस नेता के.सी. वेणुगोपाल कह्यो के नीट परीक्षा रो मुद्दो सबसूं खास मुद्दो है, क्योंकि हजारों पढेसरी अर वां रा अभिभावक घणी चिंता मं है । श्री वेणुगोपाल कह्यो के इण मुद्दे माथे चर्चा खातिर एक दिन पूरो चाहिजे, पण सरकार इण रे खातिर तैयार नी है । इण सूं पैला लोकसभा मांय विपख रा नेता राहुल गांधी मीडिया सूं कह्यो के संसद सूं ओ संदेश जाणो चाहिजे कि सरकार अर विपख पढेसरियां रे हितां री बात कर रिया है । श्री गांधी कह्यो के ओ मुद्दो देश रे युवावां सूं जुड्यो है अर इण माथे संसद मांय उचित चर्चा होणी चाहिजे ।

0000

शिक्षा मंत्री धर्मेन्द्र प्रधान आज नीट परीक्षार्थियां ने आश्वासन दियो है के दोषियां रे खिलाफ कड़ी कार्यवाही करी जावेली । संसद रे बारे पत्रकारां सूं बातचीत करता थकां वणां कह्यो के सरकार इण मुद्दे माथे संवेदनशील है । श्री प्रधान पढेसरियां अर अभिभावका ने भरोसो दिलायो है के सगळी जरूरी कार्यवाही करी जावेली । वणां कह्यो के सरकार सदन मांय किणी भी मुद्दा माथे चर्चा खातिर तैयार है ।

000

राष्ट्रीय परीक्षा एजेंसी एनटीए मांय सुधारां री सिफारिश खातिर शिक्षा मंत्रालय कानी सूं गठित विशेषज्ञां री उच्च स्तरीय समिति ने पढेसरियां अर अभिभावकां सूं सुधार अर पुनर्गठन माथे सुझाव मांग्या है । समिति रो नेतृत्व इसरो रा पेल्यां आळा अध्यक्ष डॉ के राधाकृष्णन कर रिया है । समिति उलहवअद्ध वेबसाइट रे माध्यम सूं सात जुलाई ने सुझाव अर प्रतिक्रियावां स्वीकार करेली । समिति ने दो म्हीना रे माइने रे मारयने शिक्षा मंत्रालय ने आपरी रपट सौपणे खातिर कह्यो कयो है । जिण मांय परीक्षा प्रक्रिया अर डेटा सुरक्षा प्रणाली मांय सुधार अर एनटीए री संरचना अर कार्यशैली माथे सिफारिशां करी जावेली ।

नीट पेपर लीक मामला मांय झालावाड मेडिकल कॉलेज रा केई छात्र जांच रे घेरे मांय आ गया। इण कॉलेज रा 10 छात्र संदेह रा दायरा मांय आया है, जिणसूं पूछताछ करी जा रही है, दिल्ली अर मुंबई पुलिस री जांच टीम लारले म्हीना झालावाड आयी ही अर मेडिकल कॉलेज कार्यालय सूं केई छात्र री जाणकारी मांगी। मेडिकल कॉलेज झालावाड रा डीन डॉ सुभाष चंद जैन मीडिया ने बताया के झालावाड मेडिकल कॉलेज रा केई छात्र दिल्ली भी बुलाया गया हा अर कुछ सूं कॉलेज मांय ही पूछताछ करी ज्यी ही। झालावाड मेडिकल कॉलेज रा कुछ छात्र कानी सूं डमी कॅडिडेट रे तौर माथे नीट परीक्षा देणे रो आरोप है जिण री अबार जांच चाल री है।

000000

आकाशवाणी समाचार जयपुर री कानी सूं प्रादेशिक समाचार बुलेटिनां मांय तीन नुवां आपराधिक कानूनां रे बारा मांय जागरुकता लाणे रे लखस सूं श्रृंखला चलायी जा री है। आज म्हें आपने आं कानूनां मांय पुलिस री जवाबदेही बधाने खातिर कर्या गया प्रावधानां री जाणकारी दे रिया हा। नुवा कानूनां मांय पुलिस री जवाबदेही मांय बधोतरी करीजी हैं। इण रे खातिर तलाश अर जब्ती रे चालता पुलिस कानी सूं वीडियोग्राफी जरुरी रूप सूं करी जावेली। पुलिस खातिर गिरफ्तार मिनखा रे बारा मांय जाणकारी देणो जरुरी हो गयो है। 3 बरस सूं कम सजा वाळा मामला अर 60 बरस सूं बत्ती उम्र रा लोगां खातिर मजिस्ट्रेट सूं पेल्यां अनुमति लेणों भी पुलिस खातिर जरुरी होवेला। नुवा कानूनां मांय पुलिस खातिर पकड्या गया मिनखा ने 24 घंटां रे मायने मजिस्ट्रेट रे सामे पेश करणो भी जरुरी करयो गयो है। आं कानूनां रे तैत 20 सूं बत्ती प्रावधानां कानी सूं पुलिस री जवाबदेही पक्की करीजी है।

000000

राज्यपाल कलराज मिश्र कहयो है के बालिका शिक्षा सूं ही महिला सशक्तिकरण ने बधावो दियो जा सके है। वणां कहयो के वठे समाज तेजी सूं आगे बध रियो है, जठे महिला शिक्षा ने प्राथमिकता देता व्ह्या काम करयो जावे। श्री मिश्र आज हनुमानगढ़ जिले री तहसील नोहर मांय श्री गौरीशंकर बिहानी राजकीय कन्या महाविद्यालय रा नुवा बण्या भवना रो उद्घाटन करता थकां कहयो के उच्चतर शिक्षा मांय बत्ती सूं बत्ती बालिकावां ने मौको दियो जावे। श्री मिश्र कहयो के महिला शिक्षा ही आपरा राष्ट्र अर समाज रो आधार है। आधुनिक बगत मांय महिलावां संवेदनशीलता सूं सामूहिक हितार्थ निर्णय लेणे मांय पुरुषां सूं आगे बध र समाज रो मार्ग प्रशस्त कर रही है। श्री मिश्र कहयो के आपा ने मिल र बेठियां ने मौको देणो चाहिजे।

0000

प्रदेश मांय मॉनसून और आगे बधने रे साथे ही मौसम महकमो आज भरतपुर, जयपुर, अजमेर, कोटा, बीकानेर, उदयपुर संभाग रा केई ठोडां बिरखा री आस जताई है। आज उत्तर-पूर्वी राजस्थान मांय कटे-कटे भारी बिरखा मांय बधोतरी व्हेला। पूर्वी राजस्थान री केई ठोडां मांय काले सूं 2 जुलाई ताई भारी बिरखा री गतिविधियां मांय बधोतरी व्हेला।

.....

इण बीच आज झुन्झुनूं मांय तेज बिरखा व्ही, जिणसूं गर्मी अर उमस सूं राहत मिली है। म्हाणा संवाददाता री रपट—

.....

जैसलमेर मांय चौखी बिरखा व्ही है जिण सूं ऐतिहासिक गडीसर सरोवर मांय पाणी री बढ़िया आवक व्ही है। बारिश रे पाछे सरोवर खेतर मांय दिनभर सैलानियां री चहल-पहल री। चूरू मांय बादल छाने सूं मौसम मांय ठंडक आ गयी है। पाली मांय काल रात सूं रूक-रूक र बिरखा व्हे री है। झालावाड मांय दोपहरा मांय हल्की बिरखा व्ही। राजधानी जयपुर मांय भी केई इलाकां मांय बूदाबादी व्ही।

0000

चित्तौड़गढ़ जिले मांय निंबाहेडा विधायक श्रीचंद कृपलानी अर जिला कलक्टर आलोक रंजन निंबाहेडा पंचायत समिति री ऊंखलिया ग्राम पंचायत मांय रात्रि चौपाल लगायी। चौपाल मांय जन समस्यावां रो हाथों-हाथ निपटारो करणे खातिर मौके पर ही अहलकारां ने हुकम दिया। रात्रि चौपाल मांय पानी, बिजली, सड़क, पेंशन प्रकरण, आवास, राशन, अतिक्रमण साथे दूजा मामला मांय अहलकारां ने नियम रे

मुजब कार्यवाही खातिर कह्यो। रात्रि चौपाल मांय ग्रामीणां री मांग माथे खेल मैदान री चार दिवारी बणाणे, शमशान घाट खातिर जमीन देणे अर टाबरा खातिर खेल सामग्री मुहैया करणे खातिर विधायक श्रीचंद कृपलानी प्रधान ने हुकम दिया। इण ने चालता बोर्ड परीक्षावां मांय 80 फीसदी या बी सूं बत्ती अंक लागे वाळा छात्र-छात्रावां ने प्रशस्ति पत्र सूं सम्मानित कर्यो गयो।

0000

राज्य मांय आवता दीतवार 30 जून ने पल्स पोलियो अभियान रे तैत 5 बरस रा टाबरा ने पोलियो खुराक पिलाई जावेली। अभियान रे सफल संचालन खातिर जिला मांय टास्क फोर्स गठित करीजी है। 30 जून ने न्यारा-न्यारा पोलियो बूथ माथे दवा पिलाई जावेली। वठीने आगला दो दिनां मांय घर घर जा र पोलियो खुराक दी जावेली। इण रे खातिर मोबाईल टीमां बणायी ज्यी हैं। साथे ही रेल्वे टेशनां अर बस स्टैण्ड माथे भी पोलियो री दावा पिलाणे खातिर खास मोबाइल दल गठित कर्या गया है। राष्ट्रीय पल्स पोलियो महाअभियान रे बारा मांय जागरूकता खातिर आज झालावाड मांय रैली निकाळी ज्यी।

00000

संसदीय कार्य अर विधि मंत्री जोगाराम पटेल आज जोधपुर जिला री ग्राम पंचायत कुड़ी भगतासनी मांय मनरेगा कामां रो शुभारंभ कर्यो। वणां कह्यो के राज्य सरकार कानी सूं मनरेगा रै तेत आमजन ने रोजगार रा मौका मुहैया कराया जा रह्या है। वणां बतायो के मनरेगा निर्माण कामा सूं जठे स्थानीय जॉब कार्ड धारक श्रमिकां ने रोजगार मुहैया व्हेला, वठीने इण सूं गांव रे विकास मांय इजाफो भी होवेल।

000

झुंझुनूं मांय आज पंचदेव मंदिर रे कने एक बिजली पोल मांय करंट आने सूं पांच जणा चपेट मं आ गया। इण्या मांय सूं एक री मौत व्हेगी। वठीने तीन जणा झुळस गया, इण रे अलावा एक घायल मिनख पाणी मं बह गयो, जिण री तलाश करी जा री है। करंट सं झुळसया लोगां ने शहर रे भगवानदास खेतान अस्पताल मांय भर्ती करायो गयो है।

00000